## OʻZBEKISTON RESPUBLIKASI VAZIRLAR MAHKAMASI HUZURIDAGI DAVLAT TEST MARKAZI

## OLIY TA'LIM MUASSASALARIGA KIRISH UCHUN BERILADIGAN IMTIYOZLAR

Ma'lumotnoma

(2022-2023-oʻquv yili uchun)

Ma'lumotnomada oliy ta'lim muassasalarining bakalavriat ta'lim yoʻnalishlariga kirish uchun beriladigan imtiyozlar va ularning qoʻllanishi boʻyicha ma'lumotlar keltirilgan boʻlib, ma'lumotnoma oliy ta'lim muassasalarining bakalavriat ta'lim yoʻnalishlariga kirish istagini bildirgan abituriyentlarga moʻljallangan.

Abituriyentlarga oliy ta'lim muassasalarining bakalavriat ta'lim yoʻnalishlariga kirish uchun imtiyozlar hukumatning tegishli qarorlari (Oʻzbekiston Respublikasi Prezidentining farmon va qarorlari hamda Vazirlar Mahkamasining qarorlari) asosida berilishi mumkin.

Davlat test markazi ijrochi tashkilot boʻlib, amaldagi qonunchilik hujjatlari asosida abituriyentlarga imtiyozlarni qoʻllaydi. Qonunchilikda koʻrsatilmagan holatlarda esa hech kimga hech qanday qoʻshimcha imtiyoz berish vakolatiga ega emas.

Keltirilgan ma'lumotlar 2022-2023-oʻquv yili uchun oʻrinli boʻlib, hukumatning tegishli qarorlariga oʻzgartirishlar kiritilgan yoki oʻz kuchini yoʻqotgan taqdirda imtiyozlarning qoʻllanishi oʻzgarishi mumkin.

#### Tuzuvchi:

**J.T.Odilov** – Davlat test markazi bosh mutaxassisi.

## Taqrizchi:

**G.R.Madrahimova** – Davlat test markazi yuridik byuro boshligʻi.

## **MUNDARIJA**

I. Imtihonsiz qoʻshimcha davlat granti asosida talabalikka tavsiya	etish
uchun asos boʻluvchi imtiyozlar	

Harbiy qism qo'mondonligi va O'zbekiston yoshlar ittifoqining	_
tavsiyanomasiga ega abituriyentlar	
Harbiy xizmatchilarning farzandlari	
Ichki ishlar organlari xodimlari farzandlari	7
Bojxona organlari xodimlarining farzandlari	8
Respublika va xalqaro sport musobaqalari gʻoliblari	9
Respublika va xalqaro shaxmat va shashka turnirlari gʻoliblari	10
Zulfiya nomidagi Davlat mukofoti laureatlari	11
"Nihol" mukofoti sohiblari	12
Madaniyat vazirligining respublika koʻrik-tanlovlari gʻoliblari	13
"Mard oʻgʻlon" davlat mukofoti sohiblari	14
"Tarbiyachi" respublika tanlovi gʻoliblari	15
"Hamshira" respublika tanlovi gʻoliblari	16
Oʻzbekiston yoshlar ittifoqining faol a'zolari	17
Xalqaro olimpiadalar gʻoliblari	18
Prezident maktablari bitiruvchilari	19
II. Imtihonsiz bazaviy toʻlov-kontrakt asosida talabalikka tavsiya e	etish
uchun asos boʻluvchi imtiyozlar	
Prezident ta'lim muassasalari agentligi tizimidagi ixtisoslashtirilgan maktablarning bitiruvchilari	
Prezident ta'lim muassasalari agentligi tizimidagi ijod maktablarinin bitiruvchilari	_
"Zakovat" intellektual oʻyini gʻoliblari	22
Profilaktika inspektorlari	23
III. Tegishli fan boʻyicha imtihondan ozod etilib, ma'lum miqdorda berishga asos boʻluvchi imtiyozlar	bal
Respublika fan olimpiadalari g'oliblari	24

Chet tili sertifikatiga ega abituriyentlar	25
Musiqa, raqs, teatr, folklor, tasviriy va amaliy san'at hamda dizay yo'nalishlari bo'yicha respublika va xalqaro tanlovlar g'oliblari	
"Bolalar sport o'yinlari"ning respublika bosqichi g'oliblari	27
Umumta'lim fanlaridan milliy sertifikatga ega abituriyentlar	28
IV. Toʻplangan ballga nisbatan qoʻshimcha ball berish uchu boʻluvchi imtiyozlar	n asos
"Temurbeklar maktabi" bitiruvchilari	29
Harbiy musiqa akademik litseyi bitiruvchilari	30
V. Qoʻshimcha kvota doirasida tanlovda ishtirok etish uchu boʻluvchi imtiyozlar	n asos
Olis choʻl hududlari aholisi	31
Bobotogʻ hududidagi yoshlar	32
Harbiy xizmatchilarning farzandlari	33
Ichki ishlar organlari xodimlari farzandlari	34
Bojxona organlari xodimlarining farzandlari	35
Nogironligi boʻlgan shaxslar	36
Ota-ona qaramogʻisiz qolgan bolalar	37
Ijtimoiy himoyaga muhtoj xotin-qizlar	38
Fuqarolarning oʻzini oʻzi boshqarish organlari xodimlari	39
Harbiy qism qoʻmondonligi tavsiyanomasiga ega abituriyentlar	40
O'rmonchilar va ularning farzandlari	41
Besh yil mehnat stajiga ega boʻlgan xotin-qizlar	42
Oliy pedagogik ma'lumotga ega boʻlmagan oʻqituvchilar	43
Qoʻshimcha imtiyozlar	
Adliya vazirligi yuridik texnikumlari bitiruvchilari	44
Texnikumlarni muvaffaqiyatli tamomlagan bitiruvchilar	
Prezident grantiga da'vogar abituriyentlar	46
Hokim vordamchilari	47

## I. IMTIHONSIZ QOʻSHIMCHA DAVLAT GRANTI ASOSIDA TALABALIKKA TAVSIYA ETISH UCHUN ASOS BOʻLUVCHI IMTIYOZLAR

## Harbiy qism qoʻmondonligi va Oʻzbekiston yoshlar ittifoqining tavsiyanomasiga ega abituriyentlar

## Huquqiy asosi:

- 1. Oʻzbekiston Respublikasi Prezidentining "Oʻzbekiston Respublikasi Qurolli Kuchlari tizimida yoshlarga oid davlat siyosati samaradorligini oshirish boʻyicha qoʻshimcha chora-tadbirlar toʻgʻrisida" 2017-yil 17-noyabrdagi **PQ-3394-son** qarori.
- 2. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.

**Qoʻllanishi:** Oʻzbekiston Respublikasi Qurolli Kuchlari harbiy qism qoʻmondonligi (rahbariyati) va Oʻzbekiston yoshlar ittifoqining tavsiyanomasiga asosan har bir harbiy qismdan bir nafardan yuqori natijalarga erishgan yosh harbiy xizmatchi qoʻshimcha davlat granti asosida oliy ta'lim muassasalariga oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

**Mas'ul vakolatli davlat organi:** Oʻzbekiston yoshlar ittifoqi, Mudofaa vazirligi, Milliy gvardiya, Ichki ishlar vazirligi, Davlat xavfsizlik xizmati, Favqulodda vaziyatlar vazirligi.

## Harbiy xizmatchilarning farzandlari

## Huquqiy asosi:

- 1. Oʻzbekiston Respublikasi Prezidentining "Oʻzbekiston Respublikasi Qurolli Kuchlari harbiy xizmatchilari va ularning oila a'zolarini ijtimoiy qoʻllab-quvvatlashga oid qoʻshimcha choratadbirlar toʻgʻrisida" 2018-yil 14-maydagi **PQ-3726-son** qarori.
- 2. Vazirlar Mahkamasining 2018-yil 22-iyundagi **462-son** qarori bilan tasdiqlangan "Oʻzbekiston Respublikasi Qurolli Kuchlari harbiylari va uning tarkibiga kiruvchi vazirlik hamda idoralarning xodimlari farzandlarining kvota asosida respublika oliy ta'lim muassasalariga oʻqishga kirishi uchun tavsiyanomalar berish tartibi toʻgʻrisida" nizom.

Qoʻllanishi: Harbiy xizmat vazifalarini bajarish chogʻida halok boʻlgan hamda harbiy xizmat vazifalarini bajarish chogʻida yaradorlik, kontuziya, shikastlanish yoki kasalliklar oqibatida nogiron boʻlib qolgan Oʻzbekiston Respublikasi Qurolli Kuchlari tarkibiga kiruvchi vazirliklar va idoralarning harbiy xizmatchilari va Milliy gvardiya xodimlarining farzandlari vazirliklar yoki idoralarning tegishli tavsiyanomalari asosida oliy ta'lim muassasalariga kirishda belgilangan qabul koʻrsatkichlaridan tashqari tanlovsiz davlat granti asosida oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Mudofaa vazirligi, Ichki ishlar vazirligi, Favqulodda vaziyatlar vazirligi, Davlat xavfsizlik xizmati, Oʻzbekiston Respublikasi Prezidentining davlat xavfsizlik xizmati, Elektron texnologiyalarni rivojlantirish markazi, Milliy gvardiya.

## Ichki ishlar organlari xodimlari farzandlari

## Huquqiy asosi:

- 1. Oʻzbekiston Respublikasi Prezidentining "Ichki ishlar organlari xodimlari va ularning oila a'zolarini ijtimoiy himoya qilishni yanada kuchaytirish chora-tadbirlari toʻgʻrisida" 2019-yil 26-fevraldagi **PQ-4212-son** qarori.
- 2. Vazirlar Mahkamasining 2019-yil 6-maydagi **375-son** qarori bilan tasdiqlangan "Ichki ishlar organlari xodimlari farzandlarining davlat oliy ta'lim muassasalari hamda Oʻzbekiston Respublikasi Mudofaa vazirligi, Ichki ishlar vazirligi, Milliy gvardiyasi va Davlat bojxona qoʻmitasining oliy va oʻrta maxsus ta'lim muassasalariga oʻqishga kirishi uchun tavsiyanoma (taqdimnoma) berish tartibi toʻgʻrisida" nizom.

**Qoʻllanishi:** Terrorizm va jinoyatchilikka qarshi kurashish hamda jamoat xavfsizligini ta'minlash chogʻida halok boʻlgan yoki olgan jarohati tufayli nogiron boʻlib qolgan ichki ishlar organlari xodimlarining farzandlariga oliy ta'lim muassasalariga kirishda tanlovsiz, belgilangan qabul parametrlaridan tashqari davlat granti asosida oʻqishga kirish imtiyozi beriladi (*tavsiyanoma asosida*).

Tavsiyanoma **kunduzgi** yoki **sirtqi** ta'lim shakliga bir marta kirish uchun uch yildan koʻp boʻlmagan muddatga beriladi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Ichki ishlar vazirligi.

## Bojxona organlari xodimlarining farzandlari

## Huquqiy asosi:

- 1. Oʻzbekiston Respublikasi Prezidentining "Bojxona ma'muriyatchiligini yanada takomillashtirishga doir qoʻshimcha chora-tadbirlar toʻgʻrisida" 2022-yil 27-apreldagi **PF-122-son** Farmoni
- 2. Oʻzbekiston Respublikasi Prezidentining 2018-yil 12-apreldagi **PQ-3665-son** qarori bilan tasdiqlangan "Oʻzbekiston Respublikasi davlat bojxona xizmati organlarida xizmatni oʻtash toʻgʻrisida" nizom.

Qoʻllanishi: Xizmat majburiyatini bajarish chogʻida halok boʻlgan, shuningdek, xizmat majburiyatini bajarishda olgan jarohati tufayli nogiron boʻlib qolgan bojxona organlari xodimlarining farzandlari Davlat bojxona qoʻmitasi raisining tavsiyanomasi asosida belgilangan qabul parametrlaridan tashqari davlat granti asosida Oʻzbekiston Respublikasi davlat oliy ta'lim muassasalari bakalavriatining **kunduzgi** ta'lim shakliga tanlovsiz qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Shuningdek, DBQ raisi xizmat majburiyatlarini bajarish chogʻida halok boʻlgan bojxona organlari xodimlarining toʻlov-kontrakt asosida ta'lim olayotgan farzandlariga — qolgan oʻquv davri toʻlov-kontrakt mablagʻlari miqdorining toʻliq hajmini, xizmat majburiyatlarini bajarish chogʻida olgan jarohati tufayli nogiron boʻlib qolgan bojxona organlari xodimlarining toʻlov-kontrakt asosida ta'lim olayotgan farzandlariga — toʻlov-kontrakt mablagʻlari miqdorining ellik foizi miqdorini Davlat bojxona qoʻmitasining budjetdan tashqari mablagʻlari hisobidan toʻlab berish huquqiga ega.

Mas'ul vakolatli davlat organi: Davlat bojxona qo'mitasi.

## Respublika va xalqaro sport musobaqalari gʻoliblari

**Huquqiy asosi:** Vazirlar Mahkamasining 2008-yil 13-oktabrdagi **226-son** qarori bilan tasdiqlangan "Xalqaro va respublika tanlovlari, musobaqalari gʻoliblari boʻlgan akademik litseylar, professional ta'lim muassasalari va umumta'lim maktablari oʻquvchilarini taqdirlash tartibi toʻgʻrisida" nizom.

Qoʻllanishi: Kattalar va yoshlar oʻrtasida Olimpiya va Paralimpiya oʻyinlari dasturlariga kiritilgan sportning olimpiya va paralimpiya turlari boʻyicha Olimpiya va Paralimpiya, Osiyo va Paraosiyo oʻyinlari, jahon va Osiyo chempionatlarida oxirgi toʻrt yilda hamda respublika chempionatlarida oxirgi bir yilda gʻolib va sovrindor (1-3 oʻrin) boʻlgan umumiy oʻrta ta'lim maktablari, oʻrta maxsus professional ta'lim muassasalarining bitiruvchilari oliy ta'lim muassasalariga oʻqishga kirish uchun hujjatlar qabul qilish boshlanguniga qadar oliy ta'lim muassasalarining jismoniy tarbiya va sport sohasidagi ta'lim yoʻnalishlariga qoʻshimcha davlat granti asosida kunduzgi, sirtqi, kechki ta'lim shakllariga imtihon sinovlarisiz qabul qilinadilar.

Respublika (1-oʻrin) va xalqaro tanlovlar va sport musobaqalarining (Olimpiya va Paralimpiya oʻyinlari dasturlariga kiritilgan sportning olimpiya va paralimpiya turlari boʻyicha Olimpiya va Paralimpiya, Osiyo va Paraosiyo oʻyinlari, jahon va Osiyo chempionatlarida oxirgi toʻrt yilda hamda respublika chempionatlarida oxirgi bir yilda gʻolib va sovrindor (1-3 oʻrin) boʻlgan) jamoa turlari gʻoliblari oʻz komandalari tarkibidan - akademik litseylar, kasb-hunar kollejlari va umumta'lim maktablari bitiruvchilaridan oliy ta'lim muassasasiga test sinovlarisiz va qoʻshimcha imtihonsiz qabul qilish uchun uch nomzodni belgilaydilar.

Mas'ul vakolatli davlat organi: Sportni rivojlantirish vazirligi.

## Respublika va xalqaro shaxmat va shashka turnirlari gʻoliblari

**Huquqiy asosi:** Vazirlar Mahkamasining 2008-yil 13-oktabrdagi **226-son** qarori bilan tasdiqlangan "Xalqaro va respublika tanlovlari, musobaqalari gʻoliblari boʻlgan akademik litseylar, professional ta'lim muassasalari va umumta'lim maktablari oʻquvchilarini taqdirlash tartibi toʻgʻrisida" nizom.

**Qoʻllanishi:** Respublika (1-oʻrin) va xalqaro (1-5-oʻrinlar) shaxmat va shashka turnirlarida gʻolib chiqqan akademik litseylar, kasb-hunar kollejlari va umumta'lim maktablari bitiruvchilari pedagogik kadrlar tayyorlaydigan oliy ta'lim muassasasiga test sinovlarisiz va qoʻshimcha imtihonsiz qabul qilinadilar.

Bunda ularni oliy ta'lim muassasasiga imtiyozli qabul qilish ta'lim muassasasi ixtisosliklari bilan tanlovlar ixtisosliklari, sport turlarining soha bo'yicha mos kelishiga qat'iy rioya qilingan holda amalga oshiriladi.

Mas'ul vakolatli davlat organi: Sportni rivojlantirish vazirligi.

## Zulfiya nomidagi Davlat mukofoti laureatlari

## Huquqiy asosi:

- 1. Oʻzbekiston Respublikasi Prezidentining "Zulfiya nomidagi Davlat mukofotini ta'sis etish boʻyicha takliflarni qoʻllab-quvvatlash toʻgʻrisida" 1999-yil 10-iyundagi **PF-2326-son** Farmoni.
- 2. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.
- 3. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

Qoʻllanishi: Umumiy oʻrta, oʻrta maxsus, kasb-hunar ta'limi muassasalarining Zulfiya nomidagi Davlat mukofoti laureatlari boʻlgan oʻquvchilari oliy ta'lim muassasalarining bakalavriatiga, bakalavriat talabalari esa magistraturaga tegishli yoʻnalish va ixtisoslik boʻyicha sinovlarsiz qoʻshimcha davlat granti asosida oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Oila va xotin-qizlar davlat qo'mitasi.

#### "Nihol" mukofoti sohiblari

## Huquqiy asosi:

- 1. Vazirlar Mahkamasining 2006-yil 9-avgustdagi **169-son** qarori bilan tasdiqlangan "O'zbekiston Respublikasi Prezidentining yosh iste'dodlar uchun "Nihol" mukofoti to'g'risida" nizom.
- 2. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.
- 3. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

**Qoʻllanishi:** "Nihol" mukofoti sovrindorlari Madaniyat vazirligining taqdimnomalariga muvofiq Davlat komissiyasining qarori bilan madaniyat, san'at yoʻnalishidagi oliy va oʻrta maxsus oʻquv yurtlarining mos ta'lim yoʻnalishlariga tanlovdan tashqari kirish imtihonlarisiz qoʻshimcha davlat granti asosida oʻqishga qabul qilinadilar (ansambl, jamoa sifatida ishtirok etganlar bundan mustasno).

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Madaniyat vazirligi.

## Madaniyat vazirligining respublika koʻrik-tanlovlari gʻoliblari

**Huquqiy asosi:** Oʻzbekiston Respublikasi Prezidentining "Oʻzbekiston Respublikasida milliy madaniyatni yanada rivojlantirish konsepsiyasini tasdiqlash toʻgʻrisida" 2018-yil 28-noyabrdagi **PQ-4038-son** qarori.

Qoʻllanishi: Madaniyat vazirligining "Xalq cholgʻulari ijrochilari", Mukarrama Turgʻunboyeva nomidagi "Milliy raqs ijrochilari" va Yunus Rajabiy nomidagi "Yosh maqom ijrochilari" respublika koʻrik-tanlovlari gʻoliblarining bir nafardan yakka ijrochilari tegishli yoʻnalishi boʻyicha oliy ta'lim muassasasining bakalavriat bosqichiga qabul kvotasiga qoʻshimcha davlat granti asosida qabul qilinadi.

Ushbu respublika koʻrik-tanlovlari:

- Xalq cholgʻulari ijrochilari" koʻrik-tanlovi ikki yilda bir marta, dastlab 2019-yilning iyun oyida;
- Mukarrama Turgʻunboyeva nomidagi "Milliy raqs ijrochilari"
  koʻrik-tanlovi ikki yilda bir marta, dastlab 2019-yilning oktabr oyida;
- Yunus Rajabiy nomidagi "Yosh maqom ijrochilari" koʻriktanlovi ikki yilda bir marta, dastlab 2020-yilning aprel oyida oʻtkaziladi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Madaniyat vazirligi.

## "Mard o'g'lon" davlat mukofoti sohiblari

## Huquqiy asosi:

- 1. Oʻzbekiston Respublikasi Prezidentining "Mard oʻgʻlon" davlat mukofotini ta'sis etish toʻgʻrisida" 2017-yil 21-noyabrdagi **PQ-3402-son** qarori.
- 2. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

Qoʻllanishi: "Mard oʻgʻlon" davlat mukofoti sohiblari boʻlgan umumta'lim va oʻrta maxsus, kasb-hunar ta'limi muassasalarining oʻquvchilari oliy ta'lim muassasalarining bakalavriat bosqichiga, oliy oʻquv yurtlari talabalari yoki bakalavr darajasiga ega yoshlar esa magistratura bosqichiga tegishli yoʻnalish boʻyicha kirish imtihonlarisiz davlat grantlari asosida qabul qilinadilar.

Bunda "Mard oʻgʻlon" davlat mukofoti sohiblari boʻlgan umumta'lim va oʻrta maxsus, kasb-hunar ta'limi muassasalarining oʻquvchilari Oʻzbekiston Respublikasi Prezidentining 2021-yil 22-iyundagi **PQ-5157-son** qaroriga asosan oliy ta'lim muassasalarining bakalavriat bosqichiga qoʻshimcha davlat grantlari asosida qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: O'zbekiston yoshlar ittifoqi.

## "Tarbiyachi" respublika tanlovi gʻoliblari

## Huquqiy asosi:

- 1. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.
- 2. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

**Qoʻllanishi:** Maktabgacha ta'lim vazirligi tomonidan har yili oʻtkaziladigan "Tarbiyachi" respublika tanlovi gʻoliblari Davlat komissiyasining qarori bilan tegishli oliy ta'lim muassasalarining mos ta'lim yoʻnalishlariga tanlovdan tashqari kirish imtihonlari (*test sinovlari, kasbiy (ijodiy) imtihon, yozma imtihon*)siz qoʻshimcha davlat granti asosida oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Maktabgacha ta'lim vazirligi.

## "Hamshira" respublika tanlovi gʻoliblari

## Huquqiy asosi:

- 1. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.
- 2. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

**Qoʻllanishi:** Sogʻliqni saqlash vazirligi tomonidan har yili oʻtkaziladigan "Hamshira" respublika tanlovi gʻoliblari Davlat komissiyasining qarori bilan tegishli oliy ta'lim muassasalarining mos ta'lim yoʻnalishlariga tanlovdan tashqari kirish imtihonlari (*test sinovlari, kasbiy (ijodiy) imtihon, yozma imtihon*)siz qoʻshimcha davlat granti asosida oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Sog'liqni saqlash vazirligi.

## O'zbekiston yoshlar ittifoqining faol a'zolari

## Huquqiy asosi:

- 1. Vazirlar Mahkamasining "O'zbekiston yoshlar ittifoqining faol a'zolariga oliy ta'lim muassasalariga kirishda imtiyozlar berish to'g'risida" 2017-yil 14-noyabrdagi **914-son** qarori.
- 2. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

**Qoʻllanishi:** Oʻzbekiston yoshlar ittifoqining faol a'zolariga, ya'ni Oʻzbekiston yoshlar ittifoqi tizimidagi sardorlarga, boshlangʻich tashkilotlardagi yoʻnalish yetakchilariga, ikki yillik mehnat stajiga ega boʻlgan fidoyi yoshlarga oliy ta'lim muassasalariga imtiyozli qabul qilish boʻyicha tavsiyanomalar beriladi.

Bunda respublika komissiyasi tanlov natijalariga koʻra Qoraqalpogʻiston Respublikasi, viloyatlar va Toshkent shahrining bir nafardan (jami 14 nafar) eng munosib yoshlari tanlab olinadi.

Tavsiyanomaga ega Oʻzbekiston yoshlar ittifoqining faol a'zolari Davlat komissiyasining qarori bilan doimiy yashash joyidagi oliy ta'lim muassasalarining pedagogika ta'lim yoʻnalishlariga tanlovdan tashqari kirish imtihonlari (test sinovlari, kasbiy (ijodiy) imtihon, yozma imtihon)siz qoʻshimcha davlat granti asosida oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Oʻzbekiston yoshlar ittifoqi.

## Xalqaro olimpiadalar g'oliblari

## Huquqiy asosi:

- 1. Oʻzbekiston Respublikasi Prezidentining "Iqtidorli yoshlarni aniqlash va yuqori malakali kadrlar tayyorlashning uzluksiz tizimini tashkil etish chora-tadbirlari toʻgʻrisida" 2019-yil 3-maydagi **PQ-4306-son** qarori.
- 2. Oʻzbekiston Respublikasi Prezidentining "2021-2022-oʻquv yilida Oʻzbekiston Respublikasining oliy ta'lim muassasalariga oʻqishga qabul qilishning davlat buyurtmasi parametrlari toʻgʻrisida" 2021-yil 22-iyundagi **PQ-5157-son** qarori.

**Qoʻllanishi:** Xalqaro olimpiadalarda 1-3-oʻrinni egallagan abituriyentlar oliy ta'lim muassasalariga test sinovisiz va imtihonlarsiz **qoʻshimcha davlat granti asosida** qabul qilinadi. Bular:

- Xalqaro matematika olimpiadasi International Mathematical Olympiad (IMO);
- Xalqaro fizika olimpiadasi International Physics Olympiad (IPhO);
- Xalqaro kimyo olimpiadasi International Chemistry Olympiad (IChO);
- Xalqaro biologiya olimpiadasi International Biology Olympiad (IBO);
- Xalqaro informatika olimpiadasi International Olympiad in Informatics (IOI).

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Xalq ta'limi vazirligi.

#### Prezident maktablari bitiruvchilari

**Huquqiy asosi:** Oʻzbekiston Respublikasi Prezidentining "Prezident, ijod va ixtisoslashtirilgan maktablar faoliyatini yanada takomillashtirish boʻyicha qoʻshimcha chora-tadbirlar toʻgʻrisida" 2021-yil 19-iyuldagi **PQ-5188-son** qarori.

**Qoʻllanishi:** Prezident maktablari bitiruvchilari davlat oliy ta'lim tashkilotlariga umumiy belgilangan davlat granti asosidagi qabul koʻrsatkichlariga nisbatan qoʻshimcha davlat granti asosida test sinovlarisiz va qoʻshimcha imtihonlarsiz oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yoʻnalishlariga roʻyxatdan oʻtishda oʻzlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Prezident ta'lim muassasalari agentligi.

## II. IMTIHONSIZ BAZAVIY TOʻLOV-KONTRAKT ASOSIDA TALABALIKKA TAVSIYA ETISH UCHUN ASOS BOʻLUVCHI IMTIYOZLAR

# Prezident ta'lim muassasalari agentligi tizimidagi ixtisoslashtirilgan maktablarning bitiruvchilari

**Huquqiy asosi:** Oʻzbekiston Respublikasi Prezidentining "Prezident, ijod va ixtisoslashtirilgan maktablar faoliyatini yanada takomillashtirish boʻyicha qoʻshimcha chora-tadbirlar toʻgʻrisida" 2021-yil 19-iyuldagi **PQ-5188-son** qarori.

Qoʻllanishi: Prezident ta'lim muassasalari agentligi tizimidagi ixtisoslashtirilgan maktablarning bitiruvchilari ixtisoslik yoʻnalishidan kelib chiqib davlat oliy ta'lim tashkilotlarining kimyo, biologiya, fizika va axborot texnologiyalari sohalari uchun kadrlar tayyorlaydigan bakalavriat ta'lim yoʻnalishlariga umumiy belgilangan qabul parametrlaridan tashqari bazaviy toʻlov-kontrakt asosida test sinovlarisiz va qoʻshimcha imtihonlarsiz oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Prezident ta'lim muassasalari agentligi.

## Prezident ta'lim muassasalari agentligi tizimidagi ijod maktablarining bitiruvchilari

**Huquqiy asosi:** Oʻzbekiston Respublikasi Prezidentining "Prezident, ijod va ixtisoslashtirilgan maktablar faoliyatini yanada takomillashtirish boʻyicha qoʻshimcha chora-tadbirlar toʻgʻrisida" 2021-yil 19-iyuldagi **PQ-5188-son** qarori.

Qoʻllanishi: Prezident ta'lim muassasalari agentligi tizimidagi ijod maktablarining bitiruvchilari ixtisoslik yoʻnalishidan kelib chiqib davlat oliy ta'lim tashkilotlarining tilshunoslik, adabiyot, pedagogika, tarjimonlik, jurnalistika sohalari uchun kadrlar tayyorlaydigan bakalavriat ta'lim yoʻnalishlariga umumiy belgilangan qabul parametrlaridan tashqari bazaviy toʻlov-kontrakt asosida test sinovlarisiz va qoʻshimcha imtihonlarsiz oʻqishga qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

Mas'ul vakolatli davlat organi: Prezident ta'lim muassasalari agentligi.

## "Zakovat" intellektual o'yini g'oliblari

**Huquqiy asosi:** Oʻzbekiston Respublikasi Prezidentining "Zakovat" intellektual oʻyinini aholi oʻrtasida ommaviy-ma'rifiy harakatga aylantirish va boshqa intellektual oʻyinlarni rivojlantirishga oid chora-tadbirlar toʻgʻrisida" 2022-yil 20-yanvardagi **PQ-96-son** qarori.

Qoʻllanishi: "Zakovat" intellektual oʻyinini aholi oʻrtasida ommaviy-ma'rifiy harakatga aylantirish va boshqa intellektual oʻyinlarni rivojlantirish boʻyicha respublika tashkiliy qoʻmitasi tavsiyasiga koʻra intellektual oʻyinlarning respublika bosqichida gʻolib va sovrindor (1–3-oʻrinlar) boʻlgan umumiy oʻrta ta'lim maktablari, shu jumladan Prezident ta'lim muassasalari oʻquvchilari belgilangan tartibda — oʻrta maxsus va professional ta'lim muassasalari hamda oliy ta'lim muassasalariga, oʻrta maxsus va professional ta'lim muassasalari oʻquvchilari — oliy ta'lim muassasalarining tegishli ta'lim yoʻnalishlariga, oliy ta'lim muassasalari talabalari — ta'limning keyingi bosqichiga bazaviy toʻlov kontrakt asosida imtihon sinovlarisiz qabul qilinadi.

Mazkur imtiyozga ega abituriyentlar oliy ta'lim muassasalarining bakalavriat ta'lim yo'nalishlariga ro'yxatdan o'tishda o'zlari tanlagan birinchi oliy ta'lim muassasasiga talabalikka tavsiya etiladi.

**Mas'ul vakolatli davlat organi:** Xalq ta'limi vazirligi, Prezident ta'lim muassasalari agentligi, Oliy va o'rta maxsus ta'lim vazirligi.

## Profilaktika inspektorlari

**Huquqiy asosi:** Oʻzbekiston Respublikasi Prezidentining "Ichki ishlar organlari profilaktika inspektorlarining yuridik yoʻnalishdagi bilimlarini oshirish boʻyicha qoʻshimcha chora-tadbirlar toʻgʻrisida" 2021-yil 30-noyabrdagi **PQ-23-son** qarori.

Qoʻllanishi: 2022-2023-oʻquv yilidan boshlab ichki ishlar organlarida uch yildan ortiq ish stajiga ega boʻlgan, kasbiga fidoyi, tashabbuskor profilaktika (katta) inspektorlari Jamoat xavfsizligi universiteti, Toshkent davlat yuridik universiteti hamda yurisprudensiya sohasida bakalavriat ta'lim yoʻnalishi mavjud boʻlgan boshqa davlat oliy ta'lim muassasalariga (Jahon iqtisodiyoti va diplomatiya universiteti, Ichki ishlar vazirligi akademiyasi hamda Davlat bojxona qoʻmitasining Bojxona instituti bundan mustasno) kirish imtihonlarisiz sirtqi ta'lim shakliga oʻqishga qabul qilinadi.

Bunda tavsiyanoma berilgan profilaktika (katta) inspektorlari roʻyxati Ichki ishlar vaziri tomonidan har yili iyun oyida test imtihonlari natijalari va komissiya xulosasi bilan birgalikda, tavsiya etilayotgan oliy ta'lim muassasalari kesimida Oʻzbekiston Respublikasi ta'lim muassasalariga oʻqishga qabul qilish boʻyicha davlat komissiyasiga taqdim etiladi.

Oʻqishga qabul qilish Davlat komissiyasining qarori bilan toʻlov-kontrakt asosida amalga oshiriladi hamda kontrakt mablagʻlari respublika budjeti mablagʻlari hisobidan Ichki ishlar vazirligi orqali toʻlab beriladi.

Tavsiyanomaga ega profilaktika (katta) inspektorlari oliy ta'lim muassasalarining sirtqi ta'lim shakliga qabul parametrlaridan tashqari oʻqishga qabul qilinadi.

Mas'ul vakolatli davlat organi: Ichki ishlar vazirligi.

## III. TEGISHLI FAN BOʻYICHA IMTIHONDAN OZOD ETILIB, MA'LUM MIQDORDA BALL BERISHGA ASOS BOʻLUVCHI IMTIYOZLAR

## Respublika fan olimpiadalari g'oliblari

#### Huquqiy asosi:

- 1. Oʻzbekiston Respublikasi Prezidentining "Iqtidorli yoshlarni aniqlash va yuqori malakali kadrlar tayyorlashning uzluksiz tizimini tashkil etish chora-tadbirlari toʻgʻrisida" 2019-yil 3-maydagi **PQ-4306-son** qarori.
- 2. Vazirlar Mahkamasining 2021-yil 9-sentabrdagi **562-son** qarori bilan tasdiqlangan "Umumiy oʻrta ta'lim tashkilotlari, akademik litsey va kasb-hunar maktablari oʻquvchilari oʻrtasida fan olimpiadalarini tashkil etish, oʻtkazish hamda xalqaro olimpiadalar ishtirokchilarini saralash va gʻoliblarni ragʻbatlantirish tartibi toʻgʻrisida" nizom.

**Qoʻllanishi:** Asosiy olimpiadalarning toʻrtinchi (*respublika*) bosqichida 1-, 2-, 3-oʻrinlarni egallagan oʻquvchilarga ixtisoslik fani boʻyicha davlat oliy ta'lim muassasalariga kirish imtihonlarida maksimal ball olish huquqini beruvchi va uch yil muddat davomida amal qiluvchi elektron sertifikatlar beriladi.

Informatika va axborot texnologiyalari fani boʻyicha mazkur sertifikatni olgan oʻquvchilarga ixtisoslik fan sifatida matematika fanidan davlat oliy ta'lim muassasalariga kirish imtihonlarida maksimal ball olish huquqi beriladi.

Tegishli fandan beriladigan maksimal ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Mas'ul vakolatli davlat organi: Xalq ta'limi vazirligi.

## Chet tili sertifikatiga ega abituriyentlar

**Huquqiy asosi:** Vazirlar Mahkamasining "Oliy ta'lim muassasalariga oʻqishga qabul qilishda milliy hamda xalqaro baholash tizimlari sertifikatlarini tatbiq qilish chora-tadbirlari toʻgʻrisida" 2019-yil 13-maydagi **395-son** qarori.

**Qoʻllanishi:** Test sinovlari (kasbiy (ijodiy) imtihon) majmuasiga chet tili fani kiritilgan barcha bakalavriat ta'lim yoʻnalishlariga hujjat topshirgan va milliy yoki xalqaro imtihon tizimlari boʻyicha tilni bilish darajalari B2 va undan yuqori boʻlgan sertifikatga ega abituriyentlarga ushbu fandan imtihonlarsiz belgilangan maksimal ball beriladi.

Bunda Toshkent davlat yuridik universiteti uchun IELTS sertifikatiga ega abituriyentlarda **writing** moduli **5,5 ball** yoki undan yuqori boʻlishi lozim.

Imtiyoz amal qiluvchi sertifikatlar:

- ingliz tili milliy sertifikat, IELTS, TOEFL IBT 72, Cambridge Assessment English FCE, Cambridge Assessment English Linguaskill;
- yapon tili milliy sertifikat, JLPT № 2;
- nemis tili milliy sertifikat, Goethe-Zertifikat, DSD, Test DAF;
- fransuz tili milliy sertifikat, DELF, TCF4;
- boshqa tillar milliy sertifikat yoki xalqaro imtihon tizimlari.

Tegishli fandan beriladigan maksimal ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Mas'ul vakolatli davlat organi: Davlat test markazi, Xorijiy tillarni o'rganishni ommalashtirish agentligi.

Izoh: Xalqaro sertifikatlar xalqaro tashkilotlar bilan hamkorlikda tekshiriladi.

## Musiqa, raqs, teatr, folklor, tasviriy va amaliy san'at hamda dizayn yoʻnalishlari boʻyicha respublika va xalqaro tanlovlar gʻoliblari

## Huquqiy asosi:

- 1. Vazirlar Mahkamasining 2008-yil 13-oktabrdagi **226-son** qarori bilan tasdiqlangan "Xalqaro va respublika olimpiadalari, tanlovlari, musobaqalari gʻoliblari boʻlgan akademik litseylar, professional ta'lim muassasalari va umumta'lim maktablari oʻquvchilarini taqdirlash tartibi toʻgʻrisida" nizom.
- 2. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.

Qoʻllanishi: Madaniyat vazirligining musiqa, raqs, teatr, folklor, shuningdek Badiiy akademiyaning tasviriy va amaliy san'at hamda dizayn yoʻnalishlari boʻyicha respublika tanlovi (1-oʻrin) hamda mazkur yoʻnalishlardagi xalqaro tanlovlarning (1-3-oʻrinlar) gʻoliblariga tegishli oliy ta'lim muassasalarining kasbiy (ijodiy) imtihonlarida soha boʻyicha eng yuqori ball belgilangan fandan maksimal ball olish imtiyozi beriladi.

Agar kasbiy (ijodiy) imtihonlarda eng yuqori ball bir nechta fanlardan belgilangan boʻlsa, abituriyentga imtiyozli maksimal ball olish uchun fanlardan birini tanlash huquqi beriladi.

Tegishli fandan beriladigan maksimal ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Mas'ul vakolatli davlat organi: Madaniyat vazirligi, Oʻzbekiston badiiy akademiyasi.

## "Bolalar sport o'yinlari"ning respublika bosqichi g'oliblari

**Huquqiy asosi:** Oʻzbekiston Respublikasi Prezidentining "Oʻzbekiston Respublikasida jismoniy tarbiya va sportni yanada takomillashtirish va ommalashtirish chora-tadbirlari toʻgʻrisida" 2020-yil 24-yanvardagi **PF-5924-son** Farmoni.

**Qoʻllanishi:** "Bolalar sport oʻyinlari"ning jamoaviy oʻyin turlari boʻyicha respublika bosqichi gʻoliblariga (1-oʻrin) oliy ta'lim muassasalariga kirish imtihonlarida soha boʻyicha mutaxassislik fanidan maksimal ball olish huquqini beruvchi, uch yil muddat davomida amal qiluvchi sertifikat beriladi.

Tegishli fandan beriladigan maksimal ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Mas'ul vakolatli davlat organi: Sportni rivojlantirish vazirligi.

## Umumta'lim fanlaridan milliy sertifikatga ega abituriyentlar

**Huquqiy asosi:** Vazirlar Mahkamasining "Umumta'lim fanlarini bilish darajasini baholashning milliy test tizimini joriy etish to'g'risida" 2020-yil 12-oktabrdagi **646-son** qarori.

**Qoʻllanishi:** Umumta'lim fanlarini bilish darajasini baholash test sinovlari natijasi boʻyicha eng yuqori ballning kamida 60 foizini toʻplagan shaxslarga 3 yil muddat davomida amal qiluvchi davlat namunasidagi sertifikat beriladi.

Umumta'lim fanini (chet tili bundan mustasno) bilish darajasi toʻgʻrisida davlat namunasidagi sertifikatga ega boʻlgan abituriyentlarga sertifikatdagi oʻzlashtirish foiziga mos ravishda oliy ta'lim muassasasi bakalavriatiga oʻqishga qabul qilish boʻyicha test sinovlarida ushbu fandan belgilangan maksimal ballga nisbatan tabaqalashtirilgan (proporsional) ball beriladi.

Tegishli fandan beriladigan tabaqalashtirilgan ball fanlar majmuasida mazkur fan mavjud bo'lgan abituriyent tanlagan barcha ta'lim yo'nalishlari uchun o'rinli hisoblanadi.

Hozirga qadar umumta'lim fanlaridan sertifikatlash tizimi ona tili va adabiyot (oʻzbek tili va adabiyoti, rus tili va adabiyoti, qoraqalpoq tili va adabiyoti), matematika, kimyo va biologiya fanlari boʻyicha joriy etilgan boʻlib, 2022-2024-yillarda fizika, geografiya va tarix fanlaridan joriy etish belgilangan.

Mas'ul vakolatli davlat organi: Davlat test markazi.

## IV. TOʻPLANGAN BALLGA NISBATAN QOʻSHIMCHA BALL BERISH UCHUN ASOS BOʻLUVCHI IMTIYOZLAR

#### "Temurbeklar maktabi" bitiruvchilari

**Huquqiy asosi:** Oʻzbekiston Respublikasi Prezidentining "Oʻsmirlarni harbiy-vatanparvarlik ruhida tarbiyalash hamda Oʻzbekiston Respublikasi Qurolli Kuchlari va davlat xizmati uchun kadrlar zaxirasini tayyorlash tizimini takomillashtirishga oid qoʻshimcha chora-tadbirlar toʻgʻrisida" 2019-yil 28-iyundagi **PQ-4375-son** qarori.

**Qoʻllanishi:** "Temurbeklar maktabi" bitiruvchilariga Oʻzbekiston Respublikasi oliy harbiy va ixtisoslashtirilgan ta'lim muassasalariga oʻqishga kirishda Davlat test markazi tomonidan oʻtkaziladigan test sinovlarida oʻzlari toʻplagan ballarning 30 foizi miqdoridagi, respublikaning boshqa davlat oliy ta'lim muassasalariga oʻqishga kirishda esa oʻzlari toʻplagan ballarning 15 foizi miqdoridagi qoʻshimcha ballar koʻrinishida imtiyoz beriladi.

Toʻplangan ballga nisbatan qoʻshimcha ballar koʻrinishida imtiyoz abituriyent tanlagan barcha ta'lim yoʻnalishlari uchun oʻrinli hisoblanadi.

**Mas'ul vakolatli davlat organi:** Mudofaa vazirligi, Milliy gvardiya, Ichki ishlar vazirligi, Davlat xavfsizlik xizmati, Favqulodda vaziyatlar vazirligi.

## Harbiy musiqa akademik litseyi bitiruvchilari

**Huquqiy asosi:** Oʻzbekiston Respublikasi Prezidentining "Oʻzbekiston Respublikasi Milliy gvardiyasi Harbiy musiqa akademik litseyini tashkil etish toʻgʻrisida" 2022-yil 16-fevraldagi **PQ-129-son** qarori.

Qoʻllanishi: Oʻzbekiston Respublikasi Milliy gvardiyasi Harbiy musiqa akademik litseyi bitiruvchilariga Oʻzbekiston Respublikasi oliy harbiy ta'lim muassasalariga oʻqishga kirishda Davlat test markazi tomonidan oʻtkaziladigan test sinovlarida oʻzlari toʻplagan ballarning 30 foizi miqdoridagi, respublikaning boshqa davlat oliy ta'lim muassasalariga oʻqishga kirishda esa oʻzlari toʻplagan ballarning 15 foizi (shu jumladan, ijodiy imtihonlar boʻyicha) miqdoridagi qoʻshimcha ballar koʻrinishida imtiyoz beriladi.

Toʻplangan ballga nisbatan qoʻshimcha ballar koʻrinishida imtiyoz abituriyent tanlagan barcha ta'lim yoʻnalishlari uchun oʻrinli hisoblanadi.

**Mas'ul vakolatli davlat organi:** Oʻzbekiston Respublikasi Milliy gvardiyasi.

## V. QOʻSHIMCHA KVOTA DOIRASIDA TANLOVDA ISHTIROK ETISH UCHUN ASOS BOʻLUVCHI IMTIYOZLAR

#### Olis cho'l hududlari aholisi

**Huquqiy asosi:** Oʻzbekiston Respublikasi Prezidentining "Navoiy viloyatining olis choʻl tumanlarida aholining turmush darajasini yanada oshirishga doir qoʻshimcha chora-tadbirlar toʻgʻrisida" 2017-yil 25-apreldagi **PQ-2925-son** qarori.

Qoʻllanishi: Navoiy, Buxoro, Samarqand viloyatlaridagi oliy ta'lim muassasalariga oʻqishga qabul qilishda test sinovlari natijalari boʻyicha 68 va undan yuqori ballga ega boʻlgan Navoiy viloyatining olis choʻl tumanlari (Konimex, Tomdi, Uchquduq) da kamida uch yildan buyon istiqomat qilayotgan abituriyentlar keyinchalik mutaxassisligi boʻyicha ushbu hududlardagi budjet tashkilotlarida tegishli viloyat hokimligi va oliy ta'lim muassasasi oʻrtasida tuziladigan shartnoma asosida kamida 4 yil ishlab berish sharti bilan qoʻshimcha davlat granti asosida imtiyozli oʻqishga qabul qilinadi.

Bunda abituriyent oliy ta'lim muassasalarining bakalavriat ta'lim yoʻnalishlariga roʻyxatdan oʻtishda tanlagan birinchi oliy ta'lim muassasasiga (*Navoiy*, *Buxoro*, *Samarqand viloyatlaridagi oliy ta'lim muassasalaridan biri boʻlsa*) talabalikka tavsiya etiladi.

Mas'ul vakolatli davlat organi: Navoiy viloyati hokimligi.

## Bobotog' hududidagi yoshlar

**Huquqiy asosi:** Oʻzbekiston Respublikasi Prezidentining "2021-2023-yillarda Surdondaryo viloyati Uzun tumani Bobotogʻ hududini ijtimoiy-iqtisodiy rivojlantirish chora-tadbirlari toʻgʻrisida" 2021-yil 17-fevraldagi **PQ-4995-son** qarori.

**Qoʻllanishi:** 2021-2022-oʻquv yilidan kelgusi uch oʻquv yili davomida Uzun tumani Bobotogʻ hududidagi yoshlar uchun davlat grantlari boʻyicha kvotalarni oshirish limitlari doirasida Surxondaryo viloyatidagi pedagogika va tibbiyot yoʻnalishlaridagi oliy ta'lim muassasalariga qoʻshimcha maxsus kvotalar ajratiladi.

Mazkur kvotalarning taqsimoti maqsadli kvota sifatida tegishli vazirliklar tomonidan amalga oshiriladi va Davlat komissiyasi tomonidan tasdiqlanadi.

Maxsus kvota boʻyicha oʻqishga qabul qilingan yoshlar oliy ma'lumotga ega boʻlganidan soʻng, oʻz hududida kamida 5 yil davomida mehnat qilishi zarur.

Mas'ul vakolatli davlat organi: Vazirlar Mahkamasi, Oliy va o'rta maxsus ta'lim vazirligi, Sog'liqni saqlash vazirligi, Xalq ta'limi vazirligi, Davlat test markazi, Surxondaryo viloyati hokimligi.

## Harbiy xizmatchilarning farzandlari

## Huquqiy asosi:

- 1. Oʻzbekiston Respublikasi Prezidentining "Oʻzbekiston Respublikasi Qurolli Kuchlari harbiy xizmatchilari va ularning oila a'zolarini ijtimoiy qoʻllab-quvvatlashga oid qoʻshimcha choratadbirlar toʻgʻrisida" 2018-yil 14-maydagi **PQ-3726-son** qarori.
- 2. Vazirlar Mahkamasining 2018-yil 22-iyundagi **462-son** qarori bilan tasdiqlangan "Oʻzbekiston Respublikasi Qurolli Kuchlari harbiylari va uning tarkibiga kiruvchi vazirlik hamda idoralarning xodimlari farzandlarining kvota asosida respublika oliy ta'lim muassasalariga oʻqishga kirishi uchun tavsiyanomalar berish tartibi toʻgʻrisida" nizom.
- 3. Vazirlar Mahkamasining 2017-yil 20-iyundagi **393-son** qarori bilan tasdiqlangan "Oliy ta'lim muassasalarining bakalavriatiga talabalarni oʻqishga qabul qilish tartibi toʻgʻrisida" nizom.

**Qoʻllanishi:** Oʻzbekiston Respublikasi Qurolli Kuchlari tarkibiga kiruvchi vazirliklar va idoralarda harbiy xizmatni oʻtayotgan harbiy xizmatchilarning farzandlari oliy ta'lim muassasalariga kirishda ajratilgan qoʻshimcha **besh foiz** va Milliy gvardiya xodimlari farzandlari **ikki foiz** qabul kvotalari doirasida tanlovda ishtirok etadi.

Harbiy xizmatchilarning farzandlari uchun qoʻshimcha kvotalar vazirlik va idoralar kesimida taqsimlanadi va kvota doirasida eng yuqori ball toʻplagan abituriyentlar oʻzlari tanlagan birinchi oliy ta'lim muassasasiga talabalikka tavsiya etiladi. Bunda vazirlik va idoralar boʻyicha oʻtish ballari turlicha boʻlishi mumkin.

Mas'ul vakolatli davlat organi: Mudofaa vazirligi, Ichki ishlar vazirligi, Favqulodda vaziyatlar vazirligi, Davlat xavfsizlik xizmati, Oʻzbekiston Respublikasi Prezidentining davlat xavfsizlik xizmati, Elektron texnologiyalarni rivojlantirish markazi, Milliy gvardiya.

## Ichki ishlar organlari xodimlari farzandlari

## Huquqiy asosi:

- 1. Oʻzbekiston Respublikasi Prezidentining "Ichki ishlar organlari xodimlari va ularning oila a'zolarini ijtimoiy himoya qilishni yanada kuchaytirish chora-tadbirlari toʻgʻrisida" 2019-yil 26-fevraldagi **PQ-4212-son** qarori.
- 2. Vazirlar Mahkamasining 2019-yil 6-maydagi **375-son** qarori bilan tasdiqlangan "Ichki ishlar organlari xodimlari farzandlarining davlat oliy ta'lim muassasalari hamda Oʻzbekiston Respublikasi Mudofaa vazirligi, Ichki ishlar vazirligi, Milliy gvardiyasi va Davlat bojxona qoʻmitasining oliy va oʻrta maxsus ta'lim muassasalariga oʻqishga kirishi uchun tavsiyanoma (taqdimnoma) berish tartibi toʻgʻrisida" nizom.

Qoʻllanishi: Huquqbuzarliklar profilaktikasi va jinoyatchilikka qarshi kurashda munosib hissa qoʻshgan, xizmat yoki ilmiy faoliyatda yuqori natijalarga erishgan ichki ishlar organlarining amaldagi xodimlari farzandlariga oliy ta'lim muassasalarining bakalavriat ta'lim yoʻnalishlariga oʻqishga kirish uchun qoʻshimcha uch foiz davlat granti asosida qabul kvotalari ajratiladi va ular mazkur kvotalar doirasida tanlovda ishtirok etadi (tavsiyanoma asosida).

Tavsiyanoma **kunduzgi** yoki **sirtqi** ta'lim shakliga bir marta kirish uchun uch yildan koʻp boʻlmagan muddatga beriladi.

Ichki ishlar organlari xodimlari farzandlari uchun qoʻshimcha kvotalar oliy ta'lim muassasalari kesimida taqsimlanadi va abituriyent oʻzi tanlagan barcha oliy ta'lim muassasalarida (*OTMga Ichki ishlar organlari xodimlari farzandlari uchun qoʻshimcha kvota ajratilgan boʻlsa*) imtiyoz doirasida tanlovda ishtirok etadi.

Mas'ul vakolatli davlat organi: Ichki ishlar vazirligi.

## Bojxona organlari xodimlarining farzandlari

## Huquqiy asosi:

- 1. Oʻzbekiston Respublikasi Prezidentining "Bojxona ma'muriyatchiligini yanada takomillashtirishga doir qoʻshimcha chora-tadbirlar toʻgʻrisida" 2022-yil 27-apreldagi **PF-122-son** Farmoni
- 2. Oʻzbekiston Respublikasi Prezidentining 2018-yil 12-apreldagi **PQ-3665-son** qarori bilan tasdiqlangan "Oʻzbekiston Respublikasi davlat bojxona xizmati organlarida xizmatni oʻtash toʻgʻrisida" nizom.

Qoʻllanishi: Bojxona organlarining xizmatdagi ofitserlari va serjantlar tarkibi xodimlarining farzandlariga oʻqishga kirish uchun respublika davlat oliy ta'lim muassasalari bakalavriatiga ajratilgan umumiy davlat granti asosidagi qabul parametrlariga nisbatan bakalavriat ta'lim yoʻnalishlarining **kunduzgi** ta'lim shakliga alohida **ikki foiz**li davlat granti asosidagi kvotalar ajratiladi va ular mazkur kvotalar doirasida tanlovda ishtirok etadi.

Mazkur imtiyozdan foydalanish huquqi bojxona xizmatiga salmoqli hissa qoʻshgan, ish jarayonida ma'lum bir natijalarga erishgan, bojxona organlarida xizmat qilayotgan xodimlarning tegishli tavsiyanomalarga ega boʻlgan farzandlariga beriladi.

Xodimlarning farzandlari uchun ajratilgan ikki foizli qabul parametrlari doirasida oliy ta'lim muassasalariga qabul qilish Davlat bojxona qo'mitasi raisining tavsiyanomasi asosida amalga oshiriladi hamda o'rinlar Davlat test markazi tomonidan o'tkaziladigan test sinovlari natijalari bo'yicha to'plangan ballardan kelib chiqib, abituriyent kirish imtihonlarining eng yuqori ballidan kamida o'ttiz foizini to'plagan taqdirda, ketma-ketlik tartibida taqsimlanadi.

Mas'ul vakolatli davlat organi: Davlat bojxona qo'mitasi.

## Nogironligi boʻlgan shaxslar

## Huquqiy asosi:

- 1. Oʻzbekiston Respublikasi Prezidentining "Nogironligi boʻlgan shaxslarni davlat tomonidan qoʻllab-quvvatlash tizimini tubdan takomillashtirish chora-tadbirlari toʻgʻrisida" 2017-yil 1-dekabrdagi **PF-5270-son** Farmoni
- 2. Vazirlar Mahkamasining 2018-yil 2-iyundagi **417-son** qarori bilan tasdiqlangan "Oliy ta'lim muassasalariga nogironligi bo'lgan shaxslarni qo'shimcha davlat granti kvotalari asosida o'qishga qabul qilish tartibi to'g'risida" nizom.
- 3. Oʻzbekiston Respublikasi Prezidentining "Oliy ta'lim muassasalariga test sinovlari orqali qabul qilish tizimini takomillashtirish boʻyicha qoʻshimcha chora-tadbirlar toʻgʻrisida" 2019-yil 14-maydagi **PQ-4319-son** qarori.

**Qoʻllanishi:** Oliy ta'lim muassasalarining bakalavriat ta'lim yoʻnalishlariga kirish imtihonlarida toʻplash mumkin boʻlgan eng yuqori ballning 30 foizidan kam boʻlmagan ball toʻplagan nogironligi (*I va II guruh*) boʻlgan shaxslarga qoʻshimcha **ikki foiz** davlat granti asosida qabul kvotalari ajratiladi.

Nogironligi boʻlgan shaxslar uchun qoʻshimcha kvotalar oliy ta'lim muassasalari va ta'lim shakllari kesimida taqsimlanadi va abituriyent oʻzi tanlagan barcha oliy ta'lim muassasalarida (abituriyent tanlagan ta'lim shakli doirasida OTMga nogironligi boʻlgan shaxslar uchun qoʻshimcha kvota ajratilgan boʻlsa) imtiyoz doirasida tanlovda ishtirok etadi.

Shuningdek, ular test sinovlarida ishtirok etish uchun undiriladigan toʻlovdan ozod etiladi.

**Mas'ul vakolatli davlat organi:** Sogʻliqni saqlash vazirligi (Respublika tibbiy-ijtimoiy ekspertiza inspeksiyasi).

### Ota-ona qaramog'isiz qolgan bolalar

### Huquqiy asosi:

- 1. Oʻzbekiston Respublikasi Prezidentining "Bola huquqlari kafolatlarini yanada kuchaytirishga oid qoʻshimcha chora-tadbirlar toʻgʻrisida" 2019-yil 22-apreldagi **PQ-4296-son** qarori.
- 2. Oʻzbekiston Respublikasi Prezidentining "Oliy ta'lim muassasalariga test sinovlari orqali qabul qilish tizimini takomillashtirish boʻyicha qoʻshimcha chora-tadbirlar toʻgʻrisida" 2019-yil 14-maydagi **PQ-4319-son** qarori.
- 3. Oʻzbekiston Respublikasi Prezidentining "Yetim bolalar va ota-ona qaramogʻidan mahrum boʻlgan bolalarni davlat tomonidan qoʻllab-quvvatlashning yangi tizimini joriy etish chora-tadbirlari toʻgʻrisida" 2021-yil 9-avgustdagi **PQ-5216-son** qarori.

**Qoʻllanishi:** "Mehribonlik" uyi va Bolalar shaharchasining bitiruvchilari boʻlgan chin yetimlar, SOS — bolalar mahallalari va oilaviy bolalar uylari bitiruvchilari, shuningdek, yigirma besh yoshgacha boʻlgan vasiylikka, homiylikka yoki oilaga tarbiyaga olingan (patronat) yetim bolalarga oliy ta'lim muassasalariga oʻqishga kirish uchun qoʻshimcha ravishda **bir foiz**gacha davlat granti asosida qabul kvotalari ajratiladi.

Qoʻshimcha kvotalar oliy ta'lim muassasalari va ta'lim shakllari kesimida taqsimlanadi va abituriyent oʻzi tanlagan barcha oliy ta'lim muassasalarida (abituriyent tanlagan ta'lim shakli doirasida OTMga chin yetimlar uchun qoʻshimcha kvota ajratilgan boʻlsa) imtiyoz doirasida tanlovda ishtirok etadi.

Shuningdek, toʻliq davlat ta'minotidagi shaxslar test sinovlarida ishtirok etish uchun undiriladigan toʻlovdan ozod etiladi.

**Mas'ul vakolatli davlat organi:** Xalq ta'limi vazirligi, Milliy gvardiya.

# Ijtimoiy himoyaga muhtoj xotin-qizlar

### Huquqiy asosi:

- 1. Oʻzbekiston Respublikasi Prezidentining "Xotin-qizlarni qoʻllab-quvvatlash, ularning jamiyat hayotidagi faol ishtirokini ta'minlash tizimini yanada takomillashtirish chora-tadbirlari toʻgʻrisida" 2021-yil 5-martdagi **PQ-5020-son** qarori.
- 2. Vazirlar Mahkamasining "Oliy ta'lim muassasalariga qo'shimcha davlat granti asosidagi qabul ko'rsatkichlari doirasida xotin-qizlarga tanlovda ishtirok etish uchun tavsiyanoma berish va ularni o'qishga qabul qilishni tashkil etish tartibi to'g'risidagi nizomni tasdiqlash haqida" 2020-yil 23-iyundagi **402-son** qarori.

**Qoʻllanishi:** Oila va xotin-qizlar davlat qoʻmitasi tomonidan beriladigan tavsiyanomaga ega boʻlgan ehtiyojmand oilalardagi xotin-qizlarga oliy ta'lim muassasalariga oʻqishga kirish uchun qoʻshimcha **toʻrt foiz** davlat granti asosida qabul kvotalari ajratiladi va ular mazkur kvotalar doirasida tanlovda ishtirok etadi.

Xotin-qizlar uchun qoʻshimcha kvotalar kunduzgi ta'lim shakli uchun hududlar kesimida taqsimlanadi va kvota doirasida eng yuqori ball toʻplagan abituriyentlar oʻzlari tanlagan birinchi oliy ta'lim muassasasiga talabalikka tavsiya etiladi. Bunda tavsiyanomaga ega xotin-qizlar qaysi hududdagi davlat oliy ta'lim muassasasiga topshirishidan qat'iy nazar oʻzining doimiy yashash hududi uchun ajratilgan kvotalar doirasida tanlovda ishtirok etadi.

Mas'ul vakolatli davlat organi: Oila va xotin-qizlar davlat qo'mitasi.

# Fuqarolarning oʻzini oʻzi boshqarish organlari xodimlari

**Huquqiy asosi:** Vazirlar Mahkamasining "Fuqarolarning oʻzini oʻzi boshqarish organlari uchun kadrlar tayyorlash tizimini takomillashtirish chora-tadbirlari toʻgʻrisida" 2021-yil 8-yanvardagi **3-son** qarori.

**Qoʻllanishi:** Fuqarolarning oʻzini oʻzi boshqarish organlariga pedagogika va moliya-iqtisod sohalaridagi oliy ta'lim muassasalarida "5520100 — Ijtimoiy ish (faoliyatning turli sohalari boʻyicha)" bakalavriat ta'lim yoʻnalishi boʻyicha **sirtqi** ta'lim shakli uchun qoʻshimcha qabul koʻrsatkichlari ajratiladi.

Fuqarolarning oʻzini oʻzi boshqarish organlari uchun ajratiladigan qoʻshimcha qabul koʻrsatkichlari Oʻzbekiston Respublikasi Prezidentining qarori bilan tasdiqlanadigan oliy ta'lim muassasalari bakalavriatining sirtqi ta'lim shakli boʻyicha davlat buyurtmasi asosida oʻqishga qabul qilish parametrlarida belgilanadi.

Mahalla va nuroniylarni qoʻllab-quvvatlash vazirligi tomonidan berilgan tavsiyanomaga ega boʻlgan hamda kirish imtihonlaridan muvaffaqiyatli oʻtgan fuqarolarning oʻzini oʻzi boshqarish organlari xodimlari belgilangan tartibda talabalikka tavsiya etiladi.

Tavsiyanoma asosida oʻqiyotgan talabalar oʻqishini boshqa bakalavriat ta'lim yoʻnalishiga koʻchirishga ruxsat berilmaydi.

Ular uchun sirtqi ta'lim shakli doirasida oʻqitish **toʻlov-kontrakt** asosida tashkil etiladi

**Mas'ul vakolatli davlat organi:** Mahalla va nuroniylarni qo'llab-quvvatlash vazirligi.

# Harbiy qism qo'mondonligi tavsiyanomasiga ega abituriyentlar

### Huquqiy asosi:

- 1. Oʻzbekiston Respublikasi Prezidentining "Oʻzbekiston Respublikasi Qurolli Kuchlari safida muddatli harbiy xizmatni oʻtab boʻlgan fuqarolarga imtiyozlar tizimini takomillashtirishga oid qoʻshimcha chora-tadbirlar toʻgʻrisida" 2012-yil 31-maydagi **PQ-1765-son** qarori.
- 2. Vazirlar Mahkamasining 2019-yil 17-avgustdagi **681-son** qarori bilan tasdiqlangan "O'zbekiston Respublikasi Qurolli Kuchlari safida muddatli harbiy xizmatni o'tab, harbiy qism qo'mondonligining tavsiyanomalariga ega bo'lgan fuqarolarni oliy ta'lim muassasalariga qabul qilish tartibi to'g'risida" nizom.

**Qoʻllanishi:** Oʻzbekiston Respublikasi Qurolli Kuchlari safida muddatli harbiy xizmatni oʻtab, harbiy qismlar qoʻmondonligining tegishli tavsiyanomalariga ega boʻlgan abituriyentlarni respublikaning oliy ta'lim muassasalari *(oliy harbiy ta'lim muassasalari bundan mustasno)* bakalavriatiga oʻqishga kirishi uchun tegishli oʻquv yiliga tasdiqlanadigan qabul parametrlaridan tashqari alohida qabul koʻrsatkichlari ajratiladi.

Alohida qabul koʻrsatkichlari har bir oliy ta'lim muassasasining bakalavriatiga (har bir ta'lim shakli (kunduzgi, kechki, sirtqi) boʻyicha) oʻqishga qabul qilishning davlat buyurtmasi parametrlarining **besh foiz**i miqdorida belgilanadi.

Tavsiyanomaga ega abituriyentlar ular uchun belgilangan alohida qabul koʻrsatkichlari doirasida, tanlagan **birinchi oliy ta'lim muassasasi** boʻyicha tanlovda ishtirok etadi.

**Mas'ul vakolatli davlat organi:** Mudofaa vazirligi, Milliy gvardiya, Ichki ishlar vazirligi, Davlat xavfsizlik xizmati, Favqulodda vaziyatlar vazirligi.

# O'rmonchilar va ularning farzandlari

**Huquqiy asosi:** Oʻzbekiston Respublikasi Prezidentining "Oʻzbekiston Respublikasida oʻrmon xoʻjaligi tizimini 2030-yilgacha rivojlantirish konsepsiyasini tasdiqlash toʻgʻrisida" 2020-yil 6-oktabrdagi **PQ-4850-son** qarori.

**Qoʻllanishi:** 2021-2022-oʻquv yilidan boshlab Oʻrmon xoʻjaligi davlat qoʻmitasi raisining tavsiyanomasiga asosan oʻrmonchilar va ularning farzandlari uchun oliy ta'lim muassasalarining tegishli ta'lim yoʻnalishlariga davlat granti asosida belgilangan qabul kvotasiga qoʻshimcha **20 foiz** ajratiladi.

Bunda oʻrmonchilar va ularning farzandlari roʻyxatdan oʻtishda tanlagan ta'lim yoʻnalishlariga oʻrmonchilar va ularning farzandlari uchun qoʻshimcha qabul kvotalari ajratilgan boʻlsa, dastlab qoʻshimcha qabul kvotalari doirasida tanlovda ishtirok etadi.

Oʻrmonchilar va ularning farzandlari uchun ajratiladigan qoʻshimcha qabul kvotalari har yili Oʻzbekiston Respublikasi Prezidentining tegishli qarori bilan tasdiqlanadi.

Mas'ul vakolatli davlat organi: Oʻrmon xoʻjaligi davlat qoʻmitasi.

# Besh yil mehnat stajiga ega boʻlgan xotin-qizlar

**Huquqiy asosi:** Oʻzbekiston Respublikasi Prezidentining "Oila va xotin-qizlarni tizimli qoʻllab-quvvatlashga doir ishlarni yanada jadallashtirish chora-tadbirlari toʻgʻrisida" 2022-yil 7-martdagi **PF-87-son** Farmoni.

Qoʻllanishi: Xotin-qizlarga ta'lim olishlari uchun yanada qulay shart-sharoitlar yaratish, ularning ilmiy salohiyati va malakasini tizimli oshirib borishni qoʻllab-quvvatlash maqsadida 2022-2023-oʻquv yilidan boshlab mutaxassisligi boʻyicha kamida 5 yil mehnat stajiga ega, lekin oliy ma'lumotga ega boʻlmagan 500 nafar xotin-qizlar har yili Oila va xotin-qizlar davlat qoʻmitasi tavsiyanomalariga asosan davlat oliy ta'lim muassasalarining bakalavriat ta'lim yoʻnalishlariga umumiy qabul parametrlaridan tashqari alohida test sinovlari natijalariga muvofiq toʻlov-kontrakt asosida oʻqishga qabul qilinadi.

Bunda mutaxassisligi boʻyicha kamida besh yil mehnat stajiga ega boʻlgan xotin-qizlarni oliy ta'lim muassasalariga toʻlov-kontrakt asosida oʻqishga qabul qilish tartibi Vazirlar Mahkamasining qarori bilan tasdiqlanadi.

Qaror loyihasi Oila va xotin-qizlar davlat qoʻmitasi tomonidan ishlab chiqilib, Normativ-huquqiy hujjatlar loyihalari muhokamasi portaliga joylashtirilgan va muhokamadan oʻtkazilgan.

Qaror loyihasi muhokamasi 2022-yil 7-aprel kuni boshlanib, 22-aprel kuni yakunlangan.

Mas'ul vakolatli davlat organi: Oila va xotin-qizlar davlat qo'mitasi.

# Umumta'lim muassasalarida faoliyat yuritayotgan va oliy pedagogik ma'lumotga ega bo'lmagan o'qituvchilar

**Huquqiy asosi:** Oʻzbekiston Respublikasi Prezidentining "Oʻzbekistonning yangi taraqqiyot davrida ta'lim-tarbiya va ilm-fan sohalarini rivojlantirish chora-tadbirlari toʻgʻrisida" 2020-yil 6-noyabrdagi **PF-6108-son** Farmoni.

**Qoʻllanishi:** Umumta'lim muassasalarida faoliyat yuritayotgan va oliy pedagogik ma'lumotga ega boʻlmagan oʻqituvchilar uchun bakalavriatning sirtqi ta'lim shakli boʻyicha alohida maqsadli qabul parametrlari ajratiladi.

Bunda umumiy oʻrta ta'lim muassasalarida faoliyat yuritayotgan va oliy pedagogik ma'lumotga ega boʻlmagan oʻqituvchilarni pedagogik staji asosida sirtqi ta'lim shakli boʻyicha oliy ta'lim muassasalarining bakalavriatiga oʻqishga qabul qilish tartibi Vazirlar Mahkamasining qarori bilan tasdiqlanadi.

Qaror loyihasi Xalq ta'limi vazirligi tomonidan ishlab chiqilib, Normativ-huquqiy hujjatlar loyihalari muhokamasi portaliga joylashtirilgan va muhokamadan oʻtkazilgan.

Qaror loyihasi muhokamasi 2022-yil 26-aprel kuni boshlanib, 11-may kuni yakunlangan.

Mas'ul vakolatli davlat organi: Xalq ta'limi vazirligi.

### **QO'SHIMCHA IMTIYOZLAR**

### Adliya vazirligi yuridik texnikumlari bitiruvchilari

**Huquqiy asosi:** Vazirlar Mahkamasining 2021-yil 22-noyabrdagi **705-son** qarori bilan tasdiqlangan "Oʻzbekiston Respublikasi Adliya vazirligi yuridik texnikumlari bitiruvchilarini "yurisprudensiya" mutaxassisligi boʻyicha yuridik kadrlarni tayyorlashni amalga oshiruvchi oliy ta'lim tashkilotlari bakalavriatiga oʻqishga qabul qilish tartibi toʻgʻrisida" nizom.

Qoʻllanishi: Oʻzbekiston Respublikasi Adliya vazirligi yuridik texnikumlari bitiruvchilari "yurisprudensiya" mutaxassisligi boʻyicha yuridik kadrlarni tayyorlashni amalga oshiruvchi davlat oliy ta'lim tashkilotlari bakalavriatiga test sinovlarisiz yakka tartibda suhbat oʻtkazish orqali bakalavrlarni tayyorlashning maxsus uch yillik dasturi boʻyicha oʻqishga qabul qilinadi.

Yakka tartibdagi suhbatda ishtirok etish uchun yuridik texnikumlar bitiruvchilari tarkibiga adliya organlari va muassasalari xodimlari kiritilgan Maxsus komissiya tomonidan yoʻllanma olishi lozim.

Suhbat jarayonida toʻplash mumkin boʻlgan eng yuqori ball 100 ballni tashkil etadi. Yakka tartibdagi suhbatda belgilangan maksimal ballning 70 foizidan yuqori ball toʻplagan abituriyent suhbatdan oʻtgan hisoblanadi.

**Mas'ul vakolatli davlat organi:** Oʻzbekiston Respublikasi Adliya vazirligi.

# Texnikumlarni muvaffaqiyatli tamomlagan bitiruvchilar

### Huquqiy asosi:

- 1. Oʻzbekiston Respublikasi Prezidentining "Professional ta'lim tizimini yanada takomillashtirishga doir qoʻshimcha chora-tadbirlar toʻgʻrisida" 2019-yil 6-sentabrdagi **PF-5812-son** Farmoni.
- 2. Vazirlar Mahkamasining 2022-yil 11-yanvardagi **17-son** qarori bilan tasdiqlangan "Texnikumlarni muvaffaqiyatli tamomlagan bitiruvchilarni oliy ta'lim muassasalarining bakalavriat ta'lim yoʻnalishlariga suhbat asosida oʻqishga qabul qilish tartibi toʻgʻrisida" nizom.

**Qoʻllanishi:** 2022-2023-oʻquv yili qabulidan boshlab texnikumlarda oʻrta maxsus ta'lim dasturlarini muvaffaqiyatli tamomlagan bitiruvchilar oʻz sohasiga mos bakalavriat ta'lim yoʻnalishlari boʻyicha kirish imtihonlarisiz yakka tartibdagi suhbat orqali oliy ta'lim muassasalarida 2-kursdan oʻqishini davom ettirish huquqiga ega boʻladi.

Texnikumni muvaffaqiyatli tamomlaganlar toifasiga texnikumdagi butun oʻqish davrida oʻquv semestrlari yakuniga koʻra oʻzlashtirish baholari "5 (a'lo)" va "4 (yaxshi)", biroq oʻzlashtirish baholarining kamida 50 foizi (tibbiyot oliy ta'lim muassasalari uchun kamida 85 foizi) "5 (a'lo)" boʻlgan bitiruvchilar kiradi.

Suhbat jarayonida toʻplash mumkin boʻlgan eng yuqori ball 100 ballni tashkil etadi. Suhbat komissiyasining ishtirok etgan a'zolari tomonidan qoʻyilgan ballarning oʻrtachasi 67 ball va undan yuqori boʻlganda abituriyent suhbatdan oʻtgan hisoblanadi.

Mas'ul vakolatli davlat organi: Oliy va oʻrta maxsus ta'lim vazirligi.

# Prezident grantiga da'vogar abituriyentlar

**Huquqiy asosi:** Oʻzbekiston Respublikasi Prezidentining "Respublika oliy ta'lim muassasalariga talabalikka qabul qilingan iqtidorli yoshlarni yanada qoʻllab-quvvatlash chora-tadbirlari toʻgʻrisida" 2021-yil 6-iyundagi **PQ-5172-son** qarori.

**Qoʻllanishi:** Davlat oliy ta'lim muassasalari bakalavriatining kunduzgi ta'lim shakliga kirish imtihonlari natijalariga koʻra, ta'lim sohalari kesimida, ta'lim olish tilidan qat'i nazar, respublika boʻyicha eng yuqori ball toʻplagan abituriyentlarning 200 nafari Prezident grantiga da'vogar boʻladi. Bunda:

- Prezident granti uchun ajratilgan kvotaning ta'lim sohalari bo'yicha taqsimoti har yili O'zbekiston Respublikasi ta'lim muassasalariga o'qishga qabul qilish bo'yicha davlat komissiyasi tomonidan tasdiqlanadi;
- muayyan ta'lim sohasi uchun ajratilgan Prezident granti kvotasi bo'yicha so'nggi o'rindagi abituriyent va u bilan bir xil ball to'plagan barcha fuqarolar Prezident grantiga da'vogar bo'ladi;
- oliy ta'lim muassasasiga o'qishga kirishda qo'shimcha ball shaklida imtiyoz beriladigan toifadagi abituriyentlarning kirish imtihonlari natijalariga ko'ra to'plagan baliga qo'shib berilgan ballar Prezident grantiga da'vogarlarni aniqlashda hisobga olinmaydi;
- Prezident grantiga da'vogar bo'lgan abituriyentlar ro'yxati har
  yili kirish imtihonlari va tanlov to'liq yakunlangandan so'ng
  O'zbekiston Respublikasi ta'lim muassasalariga o'qishga qabul qilish
  bo'yicha davlat komissiyasi tomonidan tasdiqlanadi;
- Prezident grantiga da'vogar bo'lgan abituriyentlar davlat granti asosida o'qishga qabul qilinadi.

Mas'ul vakolatli davlat organi: Davlat test markazi.

# Hokim yordamchilari

**Huquqiy asosi:** Oʻzbekiston Respublikasi Prezidentining "Mahallada tadbirkorlikni rivojlantirish, aholi bandligini ta'minlash va kambagʻallikni qisqartirish masalalari boʻyicha hokim yordamchilari faoliyatini tashkil etish chora-tadbirlari toʻgʻrisida" 2021-yil 3-dekabrdagi **PQ-31-son** qarori.

Qoʻllanishi: 2022-2023-oʻquv yilidan boshlab oliy ma'lumotga ega boʻlmagan hokim yordamchilari davlat oliy ta'lim muassasalarining iqtisodiy ta'lim yoʻnalishlariga Qoraqalpogʻiston Respublikasi Vazirlar Kengashi Raisi, viloyatlar va Toshkent shahar hokimlarining tavsiyasiga koʻra davlat granti asosida sirtqi ta'lim shakliga suhbat asosida oʻqishga qabul qilinadi.

**Mas'ul vakolatli davlat organi:** Qoraqalpogʻiston Respublikasi Vazirlar Kengashi, viloyatlar va Toshkent shahar hokimliklari.

### Ma'lumotnoma

# OLIY TA'LIM MUASSASALARIGA KIRISH UCHUN BERILADIGAN IMTIYOZLAR

2022-2023-oʻquv yili uchun

Oʻzbekiston Respublikasi Vazirlar Mahkamasi huzuridagi Davlat test markazi. 100084, Toshkent shahri, Bogʻishamol koʻchasi, 12-uy.